

UCAPAN
YAB DATO' SERI ABDULLAH BIN HAJI AHMAD BADAWI
SEMPENA KONVENSYEN BARISAN NASIONAL KELANTAN
DI UITM MACHANG, KELANTAN
20 DISEMBER 2002

Alhamdulillah, bersyukur kita kehadiran Allah SWT, kerana dengan izin dan limpah rahmat dariNya, kita dapat berhimpun dalam bulan Syawal yang mulia ini untuk melansungkan Konvensyen BARISAN NASIONAL Negeri Kelantan. Konvensyen ini diadakan dalam suasana umat Islam baru selesai menunaikan dua dari lima rukun Islam yang difardhukan ke atas kita, menunaikan ibadah puasa di bulan Ramadhan dan menunaikan zakat fitrah.

2. Kedua-dua rukun Islam tersebut memperlihatkan dua kemurnian amal dan dua kemurnian sifat yang dianjurkan oleh agama Islam. Pertama, ibadat puasa menyemaikan komponen disiplin, mengawal nafsu dari segi shahwat, makan-minum, niat dan fikiran, mengawal lidah dari melakukan fitnah dan berkata buruk. Kedua, memperingatkan tanggungjawab kemasyarakatan, menyedarkan tanggungjawab sesama ummah kepada kumpulan yang kurang bernasib baik dengan menghulurkan zakat fitrah supaya sedikit dari nikmat kemewahan yang telah Allah anugerahkan kepada kita turut dapat dinikmati oleh kumpulan yang nasib mereka tidak sebaik kita. Kejayaan memenuhi dua rukun yang diwajibkan, memberikan kita satu kemenangan, kemenangan yang disambut dengan takbir dan tahmid, memuji dan memuja kebesaran ILLAHI menjelang fajar Syawal. Sepanjang Ramadhan juga, adalah menjadi kelaziman untuk umat Islam melakukan lebih banyak amal soleh secara berkumpulan dalam bentuk sembahyah terawih, bertadarus, bersedekah, menghidangkan jamuan berbuka puasa, lalu disambut pula dengan amalan kunjung mengunjung, ziarah menziarahi, bermaaf-maafan dalam suasana bulan Syawal yang tiba.

3. Betapa baiknya jika amalan yang telah kita sempurnakan sepanjang Ramadhan dan hubungan persaudaraan yang kita pupuk sepanjang Syawal ini, dijadikan satu budaya yang disebatikan, satu budaya yang diterapkan menjadi satu nilai yang kekal di dalam setiap hati dan setiap jiwa ahli parti, satu disiplin mengawal nafsu dan diri, tidak melakukan fitnah, memperbanyakkan amal soleh, mengamalkan sifat sedekah dari segi fikiran, tenaga, masa dan benda lalu diperkukuhkan pula dengan semangat persaudaraan yang sejati lagi ikhlas. Amal baik tersebut jika dapat dikekalkan dan tidak bersifat amalan bermusim akan menjadi pengukuh kepada ikatan perpaduan yang lebih tulen, lebih kukuh, lebih sejati dan lebih bererti bagi kita.

4. Perpaduan sesama kita adalah penentu utama kepada kekuatan organisasi. Perpaduan sesama sendiri, di kalangan anggota parti bermula di dalam UMNO kemudian melebar di kalangan rakan-rakan di dalam BARISAN NASIONAL, adalah satu kemestian. Perpaduan di antara pemimpin sesama pemimpin, di antara pemimpin bersama ahli dan di antara ahli sesama ahli di dalam parti perlu bersifat tulen, perlu bersifat ikhlas; kerana jika perpaduan itu hanya berbentuk sandiwara, hanya satu lakonan hidup, bersifat luaran semata-mata bagi tujuan pertunjukan, maka matlamat perjuangan tidak mungkin dapat dicapai, dan apa juga usaha, apa juga gerak kerja, pasti menjadi sia-sia. Apabila sandiwara selesai, apabila tirai dilabuhkan, para pelakon kembali dalam pakaian sebenar, meninggalkan panggung, meninggalkan watak yang dilakonkan, meninggalkan peranan yang dimainkan,

masing-masing menuju ke destinasi berlainan, masing-masing dilamun impian tersendiri.

5. Perjuangan politik melalui organisasi politik yang sedang kita dokong di dalam BARISAN NASIONAL ini tidak boleh berjaya jika para pemimpin dan ahli-ahli parti mengamalkan budaya teater, budaya lakonan, budaya wayang kulit atau budaya 'makyong'. Para pemimpin di dalam BARISAN NASIONAL sama ada di Kelantan malah di seluruh negara tidak boleh hidup di dalam kepura-puraan dalam satu lakonan teater, sementara ahli-ahli parti tidak wajar mengamalkan mentaliti pelakon tambahan (extras) di dalam filem dan menganggap medan politik ini sebagai satu teater yang mempunyai batas waktu persembahan dengan skrip singkat untuk memukau perhatian penonton sekadar memenuhi sesuatu persembahan hiburan.

6. Medan politik adalah teater lebih besar. Medan politik adalah teater yang menyentuh realiti. Realiti yang tidak dapat diperdayakan dengan sandiwara, realiti yang tidak boleh diselembungi dengan lakonan hidup, realiti yang tidak dapat dilindungi dengan alat solek, realiti yang tidak terpukau dengan keindahan dialog. Dalam menghadapi realiti, sifat sebenar, kehidupan sebenar, dialog sebenar dan rupa paras sebenar, akan dinilai oleh penonton yang lebih ramai. Penonton yang lebih ramai yang berada di saf belakang, pada bila-bila masa mengatasi penonton yang berada di saf hadapan yang berkesempatan berdampingan dengan barisan pelakon di dalam sesuatu teater.

7. Oleh itu perlu disedari, dalam keghairahan mendapat tepukan dari penonton di saf hadapan yang sedang duduk enak di kerusi empuk, ingatan lebih penting perlu senantiasa dilayangkan kepada mereka yang berada di saf belakang, mereka yang berada di luar panggung dan mereka yang tidak berkesempatan bertentangan mata dengan kita. Sedarlah! bahawa di kalangan penonton juga tidak kurang kepura-puraan terutama yang telah diberikan kerusi empok di teater kita.

8. Kerana itu kita dapati sokongan yang diperolehi di dalam parti, sokongan yang meletakkan kita untuk menjadi pemimpin parti di sesuatu peringkat, ada kalanya gagal diterjemahkan dalam bentuk pengaruh lebih besar untuk memenangkan parti apabila pilihanraya diadakan. BARISAN NASIONAL di Kelantan perlu meneliti pelbagai aspek dalam menghadapi teater politik setempat ini, dari segi skrip, dari segi dialog, dari segi plot, dari segi 'backdrop', dari segi pakaian dan persolekan dan dari segi pemegang watak dan pelakon. Satu barisan, satu pasukan, satu angkatan, satu 'team work' yang padu dan berkesan dalam realiti politik setempat yang bergerak dengan saling memahami dan bekerjasama, amatlah perlu; dan perlu dijelmakan dengan segera untuk menangani Kelantan yang dikatakan sedang gerhana.

9. Konvensyen ini hendaklah dijadikan sebaik-baik forum, dengan penuh jujur - dengan penuh ikhlas, secara berterus terang - secara berani mencari kata sepakat untuk BARISAN NASIONAL Kelantan menulis skrip baru dalam menghadapi realiti 'teater politik semasa' dan realiti 'teater politik setempat'. Dalam menulis skrip baru ini, beberapa pengajaran wajar diambil dari perjalanan yang telah dilalui, mengimbuai kembali kejayaan dan kegagalan, memungut pengalaman yang baik untuk dijadikan panduan dalam menggaris gerak kerja yang lebih berkesan dan lebih realistik, lebih bersungguh dan lebih komited.

10. Kedudukan BARISAN NASIONAL di Kelantan hari ini menyerupai kedudukan PERIKATAN selepas pilihanraya 1959. Dalam pilihanraya 1959, PERIKATAN hanya memenangi kerusi parlimen di Ulu Kelantan melalui calonnya Tengku Indra Petra,

sementara PAS menawan sembilan dari sepuluh kerusi parlimen yang dipertandingkan. Di peringkat Dewan Undangan Negeri, PERIKATAN hanya memenangi dua kerusi di Bandar Hilir dan di Ulu Kelantan Timor melalui calon-calonnya Wee Khoo Hock dan Mohd. Ali Abdullah sementara PAS menawan 28 dari 30 kerusi yang dipertandingkan.

11. Kesungguhan PERIKATAN memperbaiki prestasi politik di Kelantan, telah memperlihatkan keputusan memberansangkan sewaktu pilihanraya 1964 diadakan. PERIKATAN berjaya memenangi dua kerusi parlimen di kawasan Kota Bharu Hilir dan Ulu Kelantan. Walaupun PERIKATAN hanya dapat menambahkan satu kerusi parlimen namun undi majoriti di kesemua lapan kawasan parlimen yang dimenangi PAS dapat dikurangkan. Di peringkat Dewan Undangan Negeri, PERIKATAN dapat menguasai 9 kerusi, menawan 7 kerusi lawan dan meningkatkan undi majoriti di kawasan Bandar Hilir dan Ulu Kelantan Timor. Dalam pilihanraya tersebut PERIKATAN mula menghakiskan pengaruh PAS hingga tokoh tertentu PAS, Haji Mohamed bin Nasir dapat ditewaskan di Machang, Haji Ishak Lotfi dikurangkan undi majoriti dari 3,707 kepada 1,551 di Kota Bharu Selatan dan Mohd. Asri bin Haji Muda dikurangkan undi majoriti dari 3,151 kepada 2,236.

12. Peningkatan pengaruh PERIKATAN yang diperlihatkan melalui keputusan pilihanraya 1964 telah meransangkan jentera PERIKATAN khususnya UMNO untuk mengolah strategi lebih berkesan. UMNO berusaha mendapatkan tokoh-tokoh muda dan tokoh-tokoh dari kalangan profesional. Dalam pilihanraya 1969 tokoh-tokoh seperti Dr. Abdul Aziz Omar, Tengku Ahmad Rithauddeen, Mohamad bin Yaakob dan Tengku Razaleigh Hamzah telah diperkenalkan sebagai calon. PERIKATAN berjaya memenangi 4 dari 10 kerusi Parlimen, undi majoriti calon PERIKATAN di Kota Bharu Hilir dan Ulu Kelantan terus meningkat sementara undi majoriti PAS di 4 kawasan parlimen semakin merosot. Di peringkat Dewan Undangan Negeri PERIKATAN berjaya menguasai 11 kerusi, menidakkan PAS mendapat dua pertiga majoriti sementara undi majoriti PAS di 16 kawasan Dewan Undangan Negeri bertambah merosot. Tokoh-tokoh PAS termasuk Mohd. Asri Haji Muda dan Muhammad bin Nasir memilih bertukar kawasan dalam pilihanraya tersebut.

13. Pilihanraya 1974, sewaktu PAS berada di dalam BARISAN NASIONAL, memberikan seratus peratus kemenangan kepada BARISAN NASIONAL, 12 kerusi di peringkat parlimen dan 36 kerusi di peringkat Dewan Undangan Negeri. Dalam pilihanraya 1978, BARISAN NASIONAL menawan 10 kerusi parlimen, tewas hanya di Pengkalan Chepa dan Bachuk, sementara di peringkat Dewan Undangan Negeri, BARISAN NASIONAL menguasai 23 kerusi, BERJASA 11 dan PAS hanya 2.

14. BARISAN NASIONAL berjaya mempertahankan 8 dari 12 kerusi Parlimen dan menguasai 25 dari 36 kerusi Dewan Undangan Negeri dalam pilihanraya 1982. Dalam pilihanraya 1986 pengaruh BARISAN NASIONAL kembali meningkat, menguasai 11 dari 13 kerusi parlimen dan 30 dari 39 kerusi Dewan Undangan Negeri. Pilihanraya 1990 memulakan sejarah paling hitam bagi BARISAN NASIONAL dan UMNO di Kelantan. BARISAN NASIONAL gagal mendapat sebarang kerusi. Kini sudah 12 tahun BARISAN NASIONAL dan UMNO Kelantan kehilangan kuasa.

15. Senario ini saya kemukakan untuk renungan kita bersama dalam usaha mencari kata sepakat, dalam usaha mengolah strategi berkesan. Peralihan kuasa yang berlaku di antara PAS dengan BARISAN NASIONAL di dalam politik Kelantan memperlihatkan dinamik politik yang berlaku. Dua faktor utama mempengaruhi dinamik politik tersebut baik di pihak PAS mahupun di pihak BARISAN NASIONAL.

Pertama: Perpaduan dan krisis di dalam parti

Kedua: Peranan angkatan muda di dalam parti

16. Kerajaan PAS dapat ditumbangkan dalam tahun 1978, ketika PAS menghadapi krisis sesama pemimpin di dalam parti. Lalu PAS berpisah dua dan lahirlah BERJASA. PAS kehilangan tumpuan, kehilangan pengaruh, kehilangan sokongan, kehilangan keyakinan sehingga Dato Mohd. Asri dalam pilihanraya 1978 telah merantau memilih bertanding di dalam kawasan parlimen Padang Terap di Kedah tetapi tetap tewas, mencuba semula nasib di kawasan Parlimen Nilam Puri Kelantan dalam pilihanraya 1982 tetapi tetap gagal, sekadar berjaya memenangi kerusi Dewan Undangan Negeri di Kubang Kerian. Meski PAS mula menambahkan kerusi dalam pilihanraya 1982 namun krisis yang terus melanda kepimpinan PAS telah menghakis pengaruh PAS dan dalam pilihanraya 1986 PAS hanya tinggal dengan 2 kerusi di peringkat parlimen.

17. UMNO hilang pengaruh dan hilang kuasa di Kelantan disebabkan perpecahan yang berlaku di dalam UMNO hingga sebahagian besar ahli UMNO mengambil ketetapan keluar dari parti dalam pilihanraya 1990 hinggalah kepada pilihanraya 1995. Meskipun UMNO sepatutnya kembali bertenaga dalam pilihanraya 1999 setelah Parti Semangat 46 dibubarkan, namun dalam memperolehi semula teman-teman lama, UMNO kehilangan pula kumpulan baru dengan tertubuhnya PARTI KEADILAN.

18. Kemaraan PERIKATAN setapak demi setapak hingga menghindarkan kerajaan PAS majoriti dua pertiga dalam pilihanraya 1969 adalah hasil dari usaha berkesan kepimpinan UMNO ketika menghadapi pilihanraya tersebut dengan mengutamakan perpaduan disamping memperkenalkan tokoh muda dan tokoh dari kalangan profesional seperti Dr. Abdul Aziz Omar, Tengku Ahmad Ritahauddeen, Mohamad bin Ya'acob dan Tengku Razaleigh Hamzah. Ternyata tokoh muda dan tokoh dari kalangan profesional yang diberikan tanggungjawab dan diberikan kepercayaan telah memberi nafas baru, wajah baru, imej baru dan keyakinan baru pengundi kepada UMNO Kelantan hingga berupaya melebarkan pengaruh. Di dalam menghadapi pilihanraya 1986, meski ketika itu UMNO sedang mula menghadapi krisis kepimpinan susulan perletakan jawatan Dato' Musa Hitam sebagai Timbalan Perdana Menteri, namun tokoh-tokoh muda Kelantan terdiri di antaranya Ibrahim Ali, Hashim Safin dan Annuar Musa yang diberikan peluang bertanding buat pertama kali telah membantu meningkatkan keyakinan rakyat kepada proses kesinambungan dan proses peralihan secara teratur lagi tersusun yang direncanakan oleh kepimpinan BARISAN NASIONAL baik di Kelantan mahupun di peringkat nasional.

19. Pada hemat saya, jika dua faktor utama ini dapat ditangani secara bijak oleh BARISAN NASIONAL Kelantan, tidak ada sebab BARISAN NASIONAL Kelantan tidak dapat kembali bertapak hingga ke peringkat berupaya menguasai semula politik dan kerajaan negeri Kelantan. Jika setiap seorang ahli BARISAN NASIONAL di Kelantan dari peringkat perhubungan negeri, bahagian dan cawangan, dari kalangan dewasa, pemuda, wanita dan puteri semuanya seiya sekata, berdiri teguh-bersemangat kukuh memberikan sokongan padu kepada Dato' Mustapha Muhammad selaku Pengerusi BARISAN NASIONAL Kelantan, saya percaya kejayaan yang telah pernah tercipta dalam tahun 1969 membawa kepada kemuncak kejayaan dalam tahun 1978 akan dapat berulang kembali. Dalam hasrat mencapai matlamat politik di negeri Kelantan, tidak ada alternatif, tidak ada pilihan untuk ahli-ahli BARISAN NASIONAL Kelantan, melainkan bersatu-berpadu dalam semangat setiakawan yang tulen lagi

sejati.

20. Dalam pada itu adalah menjadi tanggungjawab wajib bagi setiap generasi menyediakan zuriat untuk meneruskan kesinambungan hayat mewarisi perjuangan. Semangat menyediakan zuriat dan menyerahkan tanggungjawab sedikit demi sedikit kepada zuriat seperti yang diamalkan di dalam keluarga hendaklah diterapkan di dalam parti. Kita semua, termasuk diri saya sendiri tidak akan kekal selamanya. Namun parti dan perjuangan tidak harus berakhir dengan hayat kita. Jangka hayat parti dan jangka hayat perjuangan harus terjamin dapat diteruskan hingga ke hari kiamat. Tunas- tunas muda di dalam parti harus dibantu untuk dapat tumbuh segar dan hidup merimbun. Hanya budaya rimba yang mengamalkan perbuatan membunuh anak sendiri serta memiliki rasa cemburu dan terancam kepada zuriat sendiri.

21. BARISAN NASIONAL akan lemah, BARISAN NASIONAL akan tenat, BARISAN NASIONAL akan pupus dan BARISAN NASIONAL akan luput jika tidak segera dibangunkan barisan muda - barisan pelapis - barisan pengganti, untuk diberikan peluang, untuk dididik, untuk diasuh, untuk dibantu supaya cepat menjadi matang bagi terus menyalakan obor perjuangan parti. Kebijaksanaan parti mengimbangkan peranan di antara generasi terdahulu, generasi semasa dan generasi muka adalah faktor penting untuk menstabil dan mengukuhkan parti. Kesediaan pemimpin terdahulu dan pemimpin semasa memberikan laluan - memberikan peluang kepada pemimpin muda dan pemimpin muka mengambil tanggungjawab adalah peringkat pengorbanan paling besar dan peringkat keikhlasan paling tinggi di dalam perjuangan. Ingatlah! Sedarlah! Insafilah! Kejayaan parti adalah lebih utama dari kedudukan peribadi sendiri.

22. Saya penuh yakin dengan pengalaman yang ada di kalangan tokoh-tokoh lama, digabungkan dengan keberanian tokoh-tokoh semasa, diperkukuhkan dengan semangat tokoh-tokoh muda, berteraskan perpaduan yang ikhlas lagi tulen, dengan sokongan dan bantuan BARISAN NASIONAL Pusat, dengan semangat dan kesungguhan setiap ahli parti, setiap seorang dari saudara-saudari akan menjadi bintang-bintang yang bergemerlapan dan akan dapat membawa sinar mencahayakan semula BARISAN NASIONAL hingga Kelantan terkeluar dari suasana gerhana.

23. Semoga Allah SWT memberikan kita hikmah dan petunjuk untuk setiap kita dapat menemui jalan perjuangan yang diredhai.

Dengan berkat suratul Fatihah, saya merasmikan Konvensyen BARISAN NASIONAL Kelantan, Al Fatihah.